

四庫全書

史部

欽定四庫全書

史部

明史卷二百八十七

給事中_臣劉湄覆勘

總校官編修_臣朱鈐

欽定四庫全書

明史卷二百七

大學士張廷玉等奉 敕修

列傳第九十五

鄧繼曾

劉

最

朱

澗

馬明衡
林應驄

陳

迥

楊言

劉

安

薛

侃

喻

希禮

金

楊

名

黃

直

郭弘化

劉世龍

徐

虞

申

張選

黃正色

包節

弟

孝

謝廷蒞

王與齡

周

鈇

楊思忠

樊

王時舉

深

凌

儒

鄧繼曾字士魯資縣人正德十二年進士授行人世宗

即位之四月以久雨疏言明詔雖頒而廢閣大半大獄

已定而遲留尚多擬旨間出於中人奸諛漸倖於左右

禮有所不遵孝有所偏重納諫如流施行則寡是陛下

修己親賢之誠漸不如始故天降靈雨以示警戒伏願

出令必信斷獄不留事惟咨於輔臣寵勿啟於近習割
恩以定禮稽古以崇孝則一念轉移可以銷天災答天
戒矣未幾擢兵科給事中疏陳杜漸保終四事一定君
心之主宰以杜蠱惑之漸二均兩宮之孝養以杜嫌隙
之漸三一政令以杜欺蔽之漸四清傳奉以杜假託之
漸尋言興府從駕官不宜濫授帝納之嘉靖改元帝欲
尊所生為帝后會掖庭火廷臣多言咎在大禮繼曾亦
言去年五月日精門災今月二日長安榜廊災及今郊

祀日內廷小房又災天有五行火實主禮人有五事火
實主言名不正則言不順言不順則禮不興今歲未期
而災者三廢禮失言之效也提督三千營廣寧伯劉佶
久病繼曾論罷之宣大關陝廣西數有警中原盜竊發
繼曾陳戰守方畧及儲將練兵足食之計多議行三年
帝漸疏大臣政率內決繼曾抗章曰比來中旨大戾王
言事不考經文不會理悅邪說之諂媚則賜敕褒俞惡
師保之抗言則漸將放黜臣目覩出涕口誦吞聲夫祖

宗以來凡有批答必付內閣擬進者非止慮獨見之或偏亦防矯偽者之假託也正德之世蓋極弊矣尚未有如今日之可駭可歎者左右羣小目不知書身未經事乘隙招權弄筆取寵故言出無稽一至於此陛下不與大臣共政而倚信羣小臣恐大器之不安也疏入帝震怒下詔獄掠治謫金壇縣丞給事中張達韓楷鄭一鵬御史林有孚馬明衡季本皆論救不報累遷至徽州知府卒帝初踐阼言路大開進言者或過於切直帝亦優

容之自劉最及繼曾得罪後厭薄言官廢黜相繼納諫之風微矣最字振廷崇仁人繼曾同年進士由慈利知縣入為禮科給事中世宗議定策功大行封拜最疏止之尋請帝勤聖學於宮中日誦大學衍義勿令左右近習誘以匪僻嘉靖二年中官崔文以禱祠事誘帝最極言其非且奏文耗帑金狀而帝從文言命最自覈侵耗數最言帑銀屬內府雖計臣不得稽贏縮文乃欲假難行事逃已罪制言官疏入忤旨出為廣德州判官言官

論救不納已而東廠太監芮景賢奏最在途仍故銜乘
巨舫取夫役巡鹽御史黃國用復遣牌送之帝怒逮二
人下詔獄最充軍邵武國用謫極邊雜職法司及言官
救之責以黨比最居戍所久之赦還家居二十餘年卒
朱澍字必東莆田人舉鄉試第一嘉靖二年成進士明
年春與同縣馬明衡並授御史甫閱月會昭聖皇太后
生辰有旨免命婦朝賀澍言皇太后親挈神器以授陛
下母子至情天日昭鑒若傳免朝賀何以慰親心而隆

孝治明衡亦言暫免朝賀在恒時則可在議禮紛更之時則不可且前者興國太后令節朝賀如儀令相去不過數旬而彼此情文互異詔旨一出臣民駭疑萬一因禮儀未節稍成嫌隙俾陛下貽譏天下非細故也時帝亟欲尊所生而羣臣必欲帝母昭聖相持未決二人疏入帝恚且怒立捕至內廷責以離間宮闈歸過於上下詔獄拷訊侍郎何孟春御史蕭一中論救皆不聽御史陳逅季本員外郎林應驄繼諫帝愈怒并下詔獄遠謫

之帝必欲殺二人變色謂閹臣蔣冕曰此曹誣朕不孝
罪當死冕膝行頓首請曰陛下方興堯舜之治奈何有
殺諫臣名良久色稍解欲戍之冕又固請繼以泣乃杖
八十除名為民兩人遂廢廷臣多論薦不復召淞為人
長者不欺人或為人欺亦不校與明衡皆貧淞尤甚鄉
里利病必與有司言雖忤弗顧家居三十餘年卒明衡
字子萃父思聰死宸濠難自有傳明衡登正德十二年
進士授太常博士甫為御史即與淞同得罪閹中學者

率以蔡清為宗至明衡獨受業於王守仁閩中有王氏學自明衡始陳逅字良會常熟人正德六年進士除福清知縣入為御史以救兩人謫合浦主簿累官河南副使帝幸承天坐供具不辦下獄為民林應驄亦莆田人明衡同年進士授戶部主事嘉靖初尚書孫交覈各官莊田帝以其數稍參差有旨詰狀應驄言部疏臣司檢視即有誤當罪臣尚書總領部事安能徧閱今旬日間戶工二部尚書相繼令對狀非尊賢優老之意疏入奪

俸以救澍等謫徐聞縣丞代其長朝覲疏陳時事多議行

楊言字惟仁鄞人正德十六年進士授行人嘉靖四年擢禮科給事中閱數日即上言邇者仁壽宮災諭羣臣修省臣以為責在公卿而不在陛下罪在諫官而不在聖躬朝廷設六科所以舉正欺蔽也今吏科失職致陛下賢否混淆進退失當大臣蔣冕林俊輩去矣小臣王相張漢卿等皆得禍矣而張璁桂萼始由捷徑以竊清

秩終怙威勢以賊良善戶科失職致陛下儉德不聞而
張崙輩請索無厭崔和輩敢亂舊章禮科失職致陛下
享祀未格於神而廟社無懌懌之庇兵科失職致陛下
綱紀廢弛而錦衣多冒濫之官山海攘抽分之利匠役
增收而不禁奏帶踰額而不裁刑科失職致陛下刑罰
不中元惡如藍華輩得寬籍沒之法諍臣如郭楠輩反
施桎械之刑工科失職致陛下興作不常局官陸宣輩
支俸踰於常制內監陳林輩抽解及於蕪湖凡此皆時

樊之急且大而足以拂天意者願陛下勤修庶政而罷
臣等以警有位庶可以格天心弭災變帝以浮謗責之
奸人何淵請建世室言與廷臣爭不聽言復抗章曰祖
宗身有天下大宗也君也獻皇帝舊為藩王小宗也臣
也以臣竝君亂天下大分以小宗竝大宗干天下正統
獻帝雖有盛德非若周文武創王業也欲襲世室名舛
矣如以獻帝為自出之帝是前無祖宗以獻帝為禰而
宗之是後無孝武二帝陛下前既罪醫士劉惠之言今

乃納淵之說前既俞禮卿席書之議今乃拂書之言臣不知其何謂也楊一清召入內閣言請留之三邊特旨拜張璉兵部侍郎言以璉貪佞險躁且新進未更國家事請罷璉并劾吏部尚書廖紀引匪人同官解一貫等亦諫皆不納有投匿名書御道者言請即燒之報可六年錦衣百戶王邦奇偕哈密事請誅楊廷和彭澤等下部議未覆而邦奇復誣大學士費宏石瑄陰庇廷和詞連廷和子主事悖等將興大獄言抗疏曰先帝晏駕江

彬手握邊軍四萬圖為不軌廷和密謀行誅俄頃事定
迎立聖主此社稷之勲也縱使有罪猶當十世宥之今
既以奸人言罷其官戍其長子矣乃又聽邦奇之誣而
盡逮其鄉里親戚誣為蜀黨何意聖明之朝忽有此事
至宏瑤乃天子師保之官百僚之表也邦奇心懷怨望
文飾奸言詬辱大臣熒惑聖聽若窮治不已株連益多
臣竊為國家大體惜也書奏帝震怒并收繫言親鞫於
午門羣臣悉集言備極五毒折其一指卒無抗詞既罷

下五府九卿議鎮遠侯顧仕隆等覆奏邦奇言皆虛妄
帝責仕隆等徇情然獄亦因是解謫言宿州判官御史
程啟充請還言舊任不聽稍遷溧陽知縣歷南京吏部
郎中坐事再謫知彞陵累官湖廣參議言為吏多著聲
績溧陽彞陵皆祠祀之

劉安字汝勉慈谿人嘉靖五年進士授南京工部主事
改河南道御史入臺甫一月上疏曰人君貴明不貴察
察非明也人君以察為明天下始多事矣陛下臨御八

年而治理未臻識者謂陛下之治功損於明察夫治可
以緩圖不可以急取可以休養治不可以督責成以急
切之心行督責之政於是躬親有司之事指摘臣下之
失令出而復返方信而忽疑大小臣工救過不暇多有
不安其位者孰能為陛下建長久之策以圖平治哉且
朝廷者四方之極也內之君臣習尚如此則外而撫按
守令之官風從響應上以苛察繩下以苛察應恐民窮
為起盜之源食寡無強兵之理今明天子綜核於上百

執事振刷於下叢蠹之弊十去其九所少者元氣耳伏望大包荒之量重根本之圖畧繁文而先急務簡細故而弘遠猷不以一人之毀譽為喜怒不以一言之順逆為行止久任老成優容言官則君臣上下一德一心人各安其位事事各盡其才雍熙太和之治不難見矣帝閱疏大怒逮赴錦衣衛拷訊兵科給事中胡堯時救之并逮治獄具謫堯時攸縣主簿安餘干典史築決堤數十丈人稱劉公堤再遷長沙同知擢鳳陽知府治行

卓異賜正品服以憂歸卒

薛侃字尚謙揭陽人性至孝正德十二年成進士即以侍養歸師王守仁於贛州歸語兄助教俊俊大喜率羣子姪宗鎧等往學焉自是王氏學盛行於嶺南世宗立侃授行人母訃隕絕五日始食粥嘉靖七年起故官聞守仁卒偕歐陽德輩為位朝夕哭時方議文廟祀典侃請祀陸九淵陳獻章九淵得報允已進司正十年秋疏言祖宗分封子弟必留一人京師司香有事居守或代

行祭饗列聖相承莫之或改至正德初逆瑾懷貳始令就封乞稽舊典擇親藩賢者居京師慎選正人輔導以待他日皇嗣之生此宗社大計帝方祈嗣諱言之震怒立下獄廷鞫究交通主使者南海彭澤為吏部郎無行因議禮附張孚敬遂與為腹心後京察被黜孚敬奏留之復引為諭德至太常卿侃以疏草示澤澤與侃及少詹事夏言同年生而言是時數忤孚敬澤默計儲副事觸帝諱必興大獄誣言同謀可禍也給侃藁示孚敬因

報侃曰張公甚稱善此國家大事當從中贊之與為期趣之上孚敬乃先錄侃藁以進謂出於言請勿先發以待疏至帝許之侃猶豫澤頻趣之乃上拷掠備至侃獨自承累日獄不具澤挑使引言侃瞋目曰疏我自具趣我上者爾也爾謂張少傅許助之言何豫給事中孫應奎曹汴揖孚敬避孚敬怒應奎等疏聞詔竝下言應奎汴詔獄命郭勛翟鑾及司禮中官會廷臣再鞫具得其實帝乃釋言等出孚敬密疏二示廷臣斥其忤罔令致

仕侃為民澤戍大同澤在朝專為邪媚及敗天下快之
侃至潞河遇聖壽節焚香叩祝甚謹或報參政項喬曰
小舟中有民服而祝聖者喬曰必薛中離也跡之果然
中離者侃自號也歸家益力學從游者百餘人隆慶初
復官贈御史俊子宗鎰自有傳侃歸數月御史喻希禮
石金皆以言皇嗣得罪希禮言陛下祈嗣禮成瑞雪遂
降臣以為招和致祥不盡於此往者大赦令歲免刑臣
民盡沾澤獨議禮議獄得罪諸臣遠戍邊徼乞量移近

地或特賜赦免則和氣薰蒸前星自耀帝大怒曰謂朕
罪諸臣致遲嗣續耶所司參議以聞議未上金亦言陛
下一日萬幾經理勞瘁何若中涵太虛物來順應凡人
才之用舍政事之敷施始以九卿之詳度繼以內閣之
咨謀其弗協於中者付諸臺諫之公論陛下恭默凝神
挈其綱領使精神內蘊根本充固則百斯男之慶自不
期而至王守仁首平逆藩繼靖巨寇乃因疑謗決其前
勞大禮大獄諸臣久膺流竄困鬱既久物故已多望錄

守仁功寬諸臣罪則太和之氣塞宇宙間矣帝不悅曰
金欲朕勿御萬幾即古奸臣導其君不親政之意其并
察奏尚書夏言等言二人無他腸帝益怒下二人詔獄
而責言等陳狀伏罪乃宥之二人竟謫戍邊衛久之赦
還卒隆慶初俱贈光祿少卿喻希禮麻城人石金黃梅
人巡按廣西與姚鏌不協後與守仁共撫廬蘇王受還
臺值張桂用事御史儲良才輩爭附之金獨侃侃不阿
以是有名

楊名字實卿遂寧人童子時督學王廷相奇其語補弟子員嘉靖七年鄉試第一明年以第三人及第授編修聞大母喪請急歸還朝為展書官十一年十月彗星見名應詔上書言帝喜怒失中用舍不當語切直帝銜之而答旨稱其納忠令無隱名乃復言吏部諸曹之首尚書百官之表而汪鋹小人之尤也武定侯郭勛奸回險譎太常卿陳道瀛金贇仁粗鄙酣淫數人者羣情皆曰不當用而陛下用之是聖心之偏於喜也諸臣建言觸

忤者心實可原大學士李時以愛惜人臣為請即荷嘉納而吏部不為題覆臣所謂虛文塞責者豈盡無哉夫此得罪諸臣羣情以為當宥而陛下不終宥是聖心之偏於怒也真人邵元節猥以末術過蒙采聽嘗令設醮內府且命左右大臣奔走供事遂致不肖之徒有昏夜乞哀出其門者書之史冊後世其將謂何凡此聖心之少有所偏者故臣敢抒其狂愚疏入帝震怒即執下詔獄拷訊鉉疏辨謂名乃楊廷和鄉人頃張亨敬去位廷

和黨輒思報復故攻及臣臣為上簡用誠欲一振舉朝廷之法而議者輒病臣操切且內閣大臣率務和同植黨固位故名敢欺肆至此帝深入其言益怒命所司窮詰主使名數瀕於死無所承言曾以疏草示同年生程文德乃并文德下獄侍郎黃宗明候補判官黃直救之先後皆下獄法司再擬名罪皆不當上指特詔謫名戍編伍瞿塘衛明年釋還屢薦終不復名家居二十餘年奉親孝親歿與弟台廬於墓免喪疾作卒黃直字以方

守仁之學直與同門歐陽德不阿主司意編修馬汝驥
竒之兩人遂中式直既成進士即疏陳隆聖治保聖躬
敦聖孝明聖鑒勤聖學務聖道六事除漳州推官以漳
俗尚鬼盡廢境內淫祠易其材以葺橋梁公廨御史誣
以罪送吏部降用行至中途疏請早定儲貳帝怒遣緹
騎逮問無何事釋貶沔陽判官嘗署崇陽縣事有惠政
外艱歸三年不御酒肉服闋赴部適名宗明下獄直抗

疏言九經之首曰修身其中曰敬大臣體羣臣令楊名以直言寘詔獄非所以體羣臣黃宗明以論救與同罪非所以敬大臣二者未盡天下後世疑陛下修身之道亦有所未盡矣帝大怒并下詔獄拷掠命發極邊編戍雷州衛赦還貧甚妻紡織以給朝夕直讀書談道自如久之卒隆慶初贈光祿少卿

郭弘化字子弼安福人嘉靖二年進士除江陵知縣徵授御史十一年冬彗星見弘化言按天文志井居東方

其宿為木令者彗出於井則土木繁興所致也臣聞四川湖廣貴州江西浙江山西及真定諸府之採木者勞苦萬狀應天蘇松常鎮五府方有造軌之後民間耗費不貲窰戶逃亡過半而廣東以採珠之故激民為盜至攻劫會城皆足戾天和干星變請悉停罷則彗滅而前星耀矣戶部尚書許讚等請聽弘化言帝怒曰採珠故事也朕未有嗣以是故耶責讚等附和黜弘化為民久之言官會薦報寢卒於家穆宗立贈光祿少卿

劉世龍字元卿慈谿人正德十六年進士授太倉知州
改國子助教遷南京兵部主事嘉靖十三年南京太廟
災世龍應詔陳三事一杜諂諛以正風俗天下風俗之
不正由於人心之壞人心之壞患得患失使然也今天
下刻薄相尚變詐相高諂媚相師阿比相倚仕者日壞
於上學者日壞於下彼倡此和靡然成風惟陛下赫然
矯正勿以詭隨阿比者為賢勿以正直骨鯁者為不肖
勿以私好有所賞勿以私惡有所罰虛心以防邪佞謙

受以來忠謹更敕大小臣工協恭圖治無權勢相軋朋黨相傾則風俗正矣二廣容納以開言路陛下臨御之初犯顏敢諫之臣比先朝為盛所言或傷於激切而放逐既久悔悟日深當宥其既往以次錄用死者則恤之仍令大小臣工直言時政以作忠義之氣三慎舉動以存大體立國者在敬大臣不遺故舊蓋任之既重則禮之宜優令或忽然去之忽然召之甚至嬰三木被箠楚何以勵臣節哉臣愚以為陛下歷試之餘其人果無足

取則宜以禮使退如素行無缺偶以一時喜怒輒從而顛倒之陛下固付之無心而天下有以窺陛下也至如張延齡憑寵為非法難容假側聞長老之言孝宗時待之過厚遂釀今日之禍顧區區腐鼠何足深惜獨念孝廟在天之靈太皇太后垂老之景乃至不能自庇其骨肉於情忍乎恐陛下孝養兩宮亦不能不為一動心也頃創造神御閣啟祥宮特令大臣督理其事臣以為南京太廟方被災工役之急當無過此今興作頻年四方

凋敝正時絀舉羸之會亦宜量酌緩急而為之以漸此
皆應天以實之道也疏入帝震怒謂世龍訕上庇逆械
繫至京下詔獄拷掠獄具復廷杖八十斥為民張延齡
者昭聖太后弟也帝必欲殺之故世龍重得罪後二年
又以大猾劉東山訐告盡斥諸刑曹郎羅虞臣徐申等
猶以延齡故也世龍家居五十年自養親一肉外蔬食
終身卒之日族人為治衣冠葬之徐申字周翰崑山人
嘉靖初由鄉舉除蘄水知縣改知上饒徵授刑部主事

延齡之繫獄也申奏記尚書聶賢唐龍言太后春秋高延齡旦暮戮何以慰太后心宜援議貴議親例請於帝賢等深然之獄久不決始延齡下獄提牢主事沈椿不令入獄置別所繼者益寬假之脫桎梏通家人出入會大猾劉東山亦繫獄上告延齡有不軌謀憾前主事羅虞臣答已因訐及椿等帝震怒命執先後提牢主事三十七人付詔獄撈掠申與焉獄具當輸贖還職帝命杖之廷盡謫外任而斥虞臣為民虞臣廣東順德人歷吏

部主事好剛疾惡既歸結廬山中讀書纂述年僅三十
五卒申既謫官不赴歸與同里魏校方鳳輩優游歡咏
為樂久之卒曾孫應聘字伯衡少有才名萬厯十一年
進士改庶吉士授檢討二十一年京察中蜚語當謫拂
衣歸座主沈一貫當國數招之不出家居十餘年始起
行人司副遷尚寶司丞再遷太僕少卿卒官

張選字舜舉黃正色字士尚皆無錫人同登嘉靖八年
進士正色除仁和知縣選知蕭山縣又隣境也選治蕭

山有聲十二年冬先入為戶科給事中明年四月時享
太廟遣武定侯郭勛代選上言宗廟之祭惟誠與敬孔
子曰吾不與祭如不祭傳曰神不歆非類孟春廟享遣
官暫攝中外臣心知非得已茲孟夏祫享倘更不親行
則迹涉怠玩如或聖體初復未任趨蹌宜明詔禮官先
期告廟陛下亦宜靜處齋宮以通神貺帝閱疏大怒下
之禮部尚書夏言等言代祭之文載之周官語曰子之
所慎齋戰疾疾當慎無異於祭選言非是但小臣無知

惟陛下曲赦帝愈怒責言等黨比命執選闕下杖八十
帝出御文華殿聽之每一人行杖畢輒以數報杖折者
三曳出已死帝怒猶未釋是夕不入大內遶殿走禦祭
祀記一篇一夕鋟成明旦分賜百官而選出家人投良
劑得甦帝竟削選籍選居職甫三月遽以言得罪名震
海內正色是時方憂居已補香山旋改南海座主霍韜
宗人橫甚正色繩以法韜顧以為賢豪強屏跡縣中大
理十七年召為南京御史劾兵部尚書張瓚奸貪事甚

有跡而中有歷官藩臬無一善狀語瓚言已未任藩臬
帝以誣劾奪俸兩月明年章聖太后梓宮南葬命正色
護視事竣劾中官鮑忠駒馬都尉崔元禮部尚書溫仁
和所過納饋遺帝名詰忠等皆叩頭祈哀因譖正色擅
於梓宮前乘馬執扇及江行涉險又不隨舟督護大不
敬帝遂發怒立捕下詔獄榜掠遣戍遼東正色與選初
同志相友善至是先後以直節顯正色居戍所三十年
其顛躓窮困視選尤甚穆宗初起選通政參議以年老

予致仕召正色為大理丞進少卿尋遷南京太僕卿亦引年致仕選先卒正色後數年卒

包節字元達先世嘉興人其父始遷華亭節祖鼎池州知府為治清簡早歲乞休為鄉邑所重節生五歲而孤母躬教育之登嘉靖十一年進士授東昌推官入為御史劾兵部尚書張瓚貪穢出按雲南時仕者以荒徼憚不欲往因設告就遠方之法節言此曹志甘投荒非年迫衰遲則家貧急祿志在為己豈在恤民滇中長吏所

以多不得人也請自今以附近選人充之而州縣佐貳始用此曹庶吏治可舉吏部請以節言概行於雲貴兩廣制可以疾歸起故官再按湖廣顯陵守備中官廖斌擅威福節欲繩之語先洩斌俟節謁陵時故獻膳羞遽使撤去詭稱節麾出之鍾祥民王憲告斌黨庇奸豪周章等節捕章斃之杖下斌益怒遂奏節不以正且謁陵次日始謁時當進膳不旁立褻慢大不敬奏已入節始奏斌前事帝大怒以節抵罪逮詣詔獄撈掠永戍莊浪

衛莊浪極邊敗屋頽垣節處之甚安獨念其母自傷不克終養日飲泣母訃至晝夜哭已又聞弟孝卒撫膺曰誰代吾奉祀者哭益悲病死遺言以衰經殮孝字元愛後節三年成進士由中書舍人為南京御史疏論禮部尚書溫仁和主辛丑會試有奸弊且劾庶子童承叙贊善邵希顏編修袁煒帝皆不問未幾又劾巡撫孫檉吳瀚瀚罷去孝兄弟分居南北臺竝著風采又皆有至情節官北不得養母孝遂以侍養歸母亡哀毀骨立未終

喪卒節亦繼殞時竝稱其孝

謝廷蔭字子佩富順人嘉靖十一年進士除新喻知縣徵授吏科給事中御史胡鰲言京師優倡雜處請敕五城諸非隸教坊兩院者斥去之都御史王廷相等議可帝惡鰲言褻謫鹽城丞奪廷相等俸廷蔭救之被詔切責雷震謹身殿疏陳修省數事語直帝摘疏中訛字停其俸十八年偕同官曾燧李逢周琬諫帝南巡忤旨已給事中戴嘉猷馳疏請回鑾而車駕已發帝大怒甫還

即執嘉猷并廷蒞等下詔獄謫廷蒞雲南典史屢遷浙江
魚事以侍養歸遂不出隆慶元年起故官山西俄擢
河南右參議皆不拜吏部高其行請得以新秩歸老許
之萬曆改元四川巡撫曾省吾奏言廷蒞隱居三十年
家徒四壁樂道著書宜特加京秩風勵士林詔即加進
太僕少卿又數年卒

王與齡字受甫寧鄉人嘉靖八年進士授蘇州推官入
為戶部主事調吏部進員外郎二十一年遷文選郎中

澄清銓叙所推薦皆廉靜老成大學士翟鑾為禮部主事張惟一求吏部嚴嵩為監生錢可教求東陽知縣俱書抵與齡與齡偕員外郎吳伯亨主事李大魁周鈇白之尚書許瓚具疏以聞言平時請屬甚多臣等違抗積罪如山非聖明覆庇則二權奸主於中羣鷹犬和於外臣等不為前選郎王嘉賓之斥得為近日御史謝喻之罷幸矣疏入鑾言惟一資望應遷嵩抵無致書事請逮可教訊治因言聖明日覽奏章革弊釐奸悉宸斷而讚

等妄意臣輩為之借以修怨然讚榮良第受制所屬耳
帝方信嵩又見疏中引嘉賓瑜事遂發怒切責讚除與
齡名伯亨等俱調外給事中周怡論之廷杖繫獄御史
徐宗魯等亦以為言皆奪俸自是諸司以與齡為戒無
復敢與嵩抗與齡既罷錦衣遣使偵其裝襪被外無長
物稱歎而去里居角巾躬稼圃脩然自得郡人為作平
陽四賢詩美之四賢者尚書韓文陶琰張潤及與齡也
越二十餘年卒周鈇字汝威榆次人嘉靖五年進士授

行人擢御史巡按陝西被俘民自塞外逃歸者邊將殺以冒功鈇請下詔嚴禁有報降五人以上者賞之詔可再按山東特改右春坊清紀郎兼翰林院侍書諳達將入寇總督侍郎翟鵬以聞鈇以中樞無籌策請早為計帝以為浮詞亂政責降廬州府知事旋改國子監丞擢吏部文選主事坐與齡發嵩等私屬事貶河間通判已而吏部擬擢南京吏部主事嵩言鈇調官甫四月不得驟遷帝怒詰責尚書許讚等令錄左降官遷擢者姓名

讚引罪并列陳叔頤等十六人以聞詔奪讚等俸鑄文選郎鄭曉三級銖叔頤等褫職為民廷臣論薦銖以嵩在位不復名穆宗初贈光祿少卿

楊思忠字孝夫平定人嘉靖二十年進士歷禮科給事中二十九年孝烈皇后大祥欲預祧仁宗祔后太廟下廷議尚書徐階以為非禮思忠力贊階議餘人莫敢言帝使人覘知狀及議上嚴旨譙責命階與思忠更定二人復據禮對帝益怒竟祧仁宗階故得帝眷獨銜思忠

每當遷輒報罷逾三年正旦日食陰雲不見六科合疏
賀帝摘疏中語詰為不成文曰思忠懷欺不臣久矣杖
百斤為民餘皆奪俸隆慶元年起掌吏科三遷石魚都
御史巡撫陝西五年改南京戶部右侍郎致仕卒世宗
晚年進言者多得重譴二十九年諳達薄都城通政使
樊深陳禦寇七事中言仇鸞養寇要功帝方眷鸞立斥
為民四十二年正月御史凌儒請重貪墨之罰革虛冒
之兵搜遺佚之士因薦羅洪先陸樹聲吳嶽吳悌帝惡

其市恩杖六十除名四十五年十月御史王時舉劾刑部尚書黃光昇言內官季永以訴事犯乘輿本無死比乃擬真犯奸人王相私闖良民者三本無生法乃擬矜疑宜勒令致仕帝怒命編氓口外踰月御史方新上言黃河與北狄之患自古有之乃令豐沛間陸地為渠而興都有陵寢之憂鳳陽有冰雹之厄河南有饑饉之災堯之洛水不烈於此矣諸邊將愾卒驕寇至輒巽懦觀望而寧武有軍士之變南贛有土兵之叛徽州諸府有

礦徒竊發之虞舜之三苗不棘於此矣夫泮水三苗不足為累者以堯舜兢業於上而禹皋諸臣分憂於下也今司論納者日獻禎祥而疆場之臣惟冒首功隱喪敗為國分憂者誰也斥罰之法今不得不嚴而陛下亦宜隨事自責痛加修省然後災變可息而外患可弭也疏入斥為民深大同人儒泰州人時舉順天通州人新青陽人穆宗嗣位竝復官深尋遷刑部右侍郎齊康之劾徐階也深劾康并詆高拱時登極詔書赦死罪以下囚

而流徙已至配者所司拘律令不遣深言殊死猶赦而此反不及非所以廣皇仁詔從其議旋進左侍郎罷歸儒既復御史益發舒亦以康事率同列劾拱拱罷又劾去大學士郭朴頃之劾罷撫治鄖陽都御史劉秉仁又以永平失事劾總督劉燾巡撫耿隨卿總兵官李世忠罪隨卿世忠被逮燾貶官隆慶二年儒再遷右僉都御史理山西屯鹽吏部追論其知永豐時貪墨遂落職閒住時舉復官後巡按貴州聞給事中石星廷杖且帝方

廣市珠寶馳疏救星極陳奢靡之害已請陳后還中宮
章竝報聞萬厯初都給事中雒遵御史景嵩韓必顯論
譚綸被謫時舉抗章救之厯大理左少卿新終湖廣參
議

贊曰賈山有言忠臣之事君也言切直則不用而身危
然切直之言明主之所亟欲聞忠臣之所蒙死而竭知
也鄧繼曾諸人箴王闕指時弊言切直矣而杖斥隨之
伊尹曰有言逆于汝心必求諸道有旨哉有旨哉

明史卷二百七

欽定四庫全書

明史卷二百七考證

鄧繼曾傳劉最

臣黃壽齡按陳九川所撰劉最墓誌

云最嘗獲遺金默坐以俟俟得遺者還之謹附識

薛侃傳歸語兄助教俊

臣黃壽齡按明書俊字尚賢

以博學有行著信於鄉閭侃少師事之謹附識

王與齡傳二十一年遷文選郎中

臣黃壽齡按趙時

春所撰與齡行狀云與齡遷文選郎中時以用天下

人才為已任上疏條故事請抑奔競清仕塗重撫臣
責成守令奏報謹附識

明史卷二百七考證

欽定四庫全書

明史卷二百八

大學士張廷玉等奉 敕修

列傳第九十六

張 芹

汪應軫

蕭鳴鳳

高公韶

齊之鸞

袁宗儒

許相卿

顧 濟

子章志

章 僑

余

珊

汪

珊

韋商臣

黎

貫

王汝梅

彭汝實

鄭自璧

戚賢

劉

繪

子黃裳

錢薇

洪

垣

方
呂懷

周思兼

顏

鯨

張芹字文林峽江人弘治十五年進士授福州推官正
德中召為南京御史寧夏既平大學士李東陽亦進官

庠子芹抗疏曰東陽謹厚有餘正直不足儒雅足重節義無聞逆瑾亂政東陽為顧命大臣既不能遏之於始及惡跡既彰又不能力與之抗脂韋順從惟其指使今叛賊底平東陽何力冒功受賞何以服人心乞立賜罷斥奪其加恩為大臣事君不忠者戒疏出東陽涕泣不能辯帝責芹沽名令對狀芹請罪停俸三月給事中竇明言事下獄芹疏救之帝嘗馳馬傷編修王思切諫坐遠戍芹曰彼非諫官尚爾吾儕可坐視乎遂上疏曰孟

子言從獸無厭謂之荒老耄曰馳聘田獵使人心發狂
心狂志荒何事不忘皆甚言無益有害也今輕萬乘之
尊乘危冒險萬一有不可諱皇嗣未誕如宗廟社稷何
帝不省尋出為徽州知府寧王宸濠反言者以芹家江
西慮賊劫其親屬取道出徽乃改知杭州已復還徽州
嘉靖初遷浙江海道副使歷右參政右布政使坐為海
道時倭人爭貢誤傷居民罷歸芹事繼母孝持身儉素
泉祀糲食終其身

汪應軫字子宿浙江山陰人少有志操正德十二年成
進士選庶吉士十四年詔將南巡應軫抗言自下詔以
來臣民旁皇莫有固志臨清以南率棄業罷市逃竄山
谷苟不即收成命恐變生不測昔谷永諫漢成帝謂陛
下厭高美之尊號好匹夫之卑字數離深宮挺身晨夜
與羣小相逐典門戶奉宿衛者執干戈而守空宮其言
切中於今夫谷永諧諛之臣成帝庸闇之主永言而成
帝容之豈以陛下聖明不能俯納直諫哉疏入留中繼

復偕修撰舒芬等連章以請跪闕門受杖幾斃教習竣
擬授給事中有旨補外遂出為泗州知州土瘠民情不
知農桑應軫勸之耕買桑植之募江南女工教以蠶繅
織作由是民足衣食帝方南征中使驛騷道路應軫率
壯夫百餘人列水次舟至即挽之出境車駕駐南京命
州進美婦善歌吹者數十人應軫言州子女荒陋無以
應敕旨臣向募有桑婦請納之宮中傳受蠶事事遂寢
世宗踐阼召為戶科給事中山東礦盜起掠東昌兗州

流入畿輔河南境應軫奏言弭盜與禦寇不同禦寇之法驅之境外而已若弭盜而縱使出境是嫁禍於鄰國也凡一方有警不行撲滅致延蔓他境者俱宜重論報可在科歲餘所上凡三十餘疏咸切時弊以便養乞改南遂調南京戶科張璫桂萼在南部方議追尊獻皇帝雅知應軫名欲倚以自助應軫與議不合即奏請遵禮經崇正統以安人心不報嘉靖三年春出為江西僉事居二年具疏引疾不俟命而歸為巡按所劾詔所司逮

問應軫自陳親老鮮兄弟乞休侍養吏部為之請乃免
逮久之廷臣交薦起故官視江西學政父艱歸病卒

蕭鳴鳳字子雋浙江山陰人少從王守仁遊舉鄉試第
一正德九年成進士授御史副史胡世寧下獄抗章救
之同官內江高公韶劾王瓊誤邊計言松潘副將吳坤
請增設總兵於成都瓊即以坤任之花當本我屬衛日
憑陵由本兵非人致小醜輕中國瓊恐奏訐公韶中旨
責公韶陰結外蕃交通間牒令首實鳴鳳上疏曰公韶

劾瓊所論者天下之事瓊不當逞忿恣辯以箝諫官口
中旨責鳴鳳黨庇而謫公韶富民典史鳴鳳又劾江彬
恃寵恣肆蔓將難圖士論壯之尋視山海諸關巡武宗
將出塞捕虎鳴鳳疏諫因具陳官司掎剋軍民疾苦狀
不報引疾歸起督南畿學政諸生以比前御史陳選曰
陳泰山蕭北斗嘉靖初遷河南副使仍督學政考察拾
遺被劾吏部惜其學行調為湖廣兵備副使明年復改
督廣東學政鳴鳳三督學政廉無私然性剛狠以憤撻

肇慶知府鄭璋璋慙恚投劾去由是物論大譁八年考察兩京言官交章論坐降調已與璋相抵訐皆下巡按御史逮治鳴鳳遂不出公韶正德中為御史嘗劾總兵官郭勛罪朶顏花當入寇又劾總兵官遂安伯陳璘中官王欣巡撫王倬聽坐解職世宗立起謫籍歷右副都御史巡撫江西終戶部右侍郎

齊之鸞字瑞卿桐城人正德六年進士改庶吉士授刑科給事中十一年冬帝將置肆于京城西偏之鸞上言

近聞有花酒舖之設或云車駕將臨幸或云朝廷收其
息陛下貴為天子富有四海乃至競錐刀之利如倡優
館舍乎應州奏捷帝降敕總督軍務威武大將軍總兵
官朱壽勦寇有功宜特加公爵制下舉朝大駭之鸞偕
諸給事中上言自古天子亦有親臨戰陣戡定禍亂者
成功之後不過南面受賀勒之金石播之歌頌已耳未
有加爵酬勞如今日之顛倒者不知陛下何所取義為
此不祥之舉以駭天下耳目貽百世之譏笑也未幾請

召還編修王思給事中張原陳鼎御史周廣高公韶李
熙徐文華李穩施儒劉寓生僉事韓邦奇評事羅僑皆
不聽帝將巡邊復自稱威武大將軍御史袁宗儒疏諫
大學士楊廷和蔣冕毛紀以去就爭之驚偕同官言三
臣居師保之重身係安危邇者先後稱疾今六飛臨邊
踰月矣宗廟社稷百官萬姓寄空城中人心危疑幾務
叢積復杜門求決去萬一事起倉卒至於債敗三臣將
何辭謝天下乞陛下以社稷為重亟返宸居與大臣共

圖治理已而御史李潤等復爭之卒不省之鸞再遷兵
科左給事中中官馬永成死詔受其家九十餘人官之
鸞言永成貴顯用事十有餘年兄弟子姪皆高爵美官
而其儕復為陳乞將及百人永成何功恩濫如此恐天
下聞而解體也帝將南巡之鸞偕同官及御史楊秉中
等交章力諫章入二日未報之鸞等不知所出伏闕俟
命自辰至申帝令中官傳諭乃退明日託疾免朝欲以
為之鸞等罪會諸曹郎黃輩等聯章力諫乃止不行然

鞏等下獄杖譴之鸞輩亦不敢救也宸濠反張忠許泰等南征命之鸞偕左給事中祝續從軍紀功未至賊已滅羣小忌王守仁譖毀百端之鸞力白其誣忠泰廣搜逆黨株引無辜之鸞多所開釋且請蠲田租停力役寬逋負帝頗採納初冒徐姓至是始復焉世宗踐阼首上疏言祖宗法制悉紛更于羣小補救之道在先定聖志次廣言路先朝元凶雖去根據盤互連蔓滋多猶恐巧相營結或邀定策之賞或假迎扈之勞以取憐固寵天

下事豈堪若輩更壞言者久遏於權奸欲吐忠鯁懣憤之氣必有不顧忌諱至于逆耳者在嘉納而優容之若稍或抑裁則小人又乘之以讐忠直言路一塞不可復開大為新政累矣陛下誠舉邇年亂政盡返其初中興之烈可以立覩帝嘉納之又劾許泰及兵部尚書王憲二人竟獲譴其秋大計京官被中傷謫崇德丞屢遷寧夏僉事饑民採蓬子為食之驚為取二封一進于帝一以貽閣臣且言時事可憂者三可惜者四語極切帝付

之所司時方大修邊牆之驚董役巡撫胡東臯稱其能
舉以自代歷河南山東副使召為順天府丞未行盜發
留鎮撫尋擢河南按察使卒官

袁宗儒字醇夫雄縣人正德三年進士授御史十二年
冬帝在大同以郊祀將回鑾既而復止宗儒率同官力
諫明年夏孝貞純皇后將葬帝還京宗儒等復引災異
力請罷皇店遣邊兵既又諫帝巡邊語極危切皆不報
擢大理寺丞嘉靖三年爭大禮廷杖歷官右僉都御史

巡撫貴州吏部尚書桂萼議宗儒改調遂解職歸未幾起鄖陽改山東坐屬吏振饑無術不能覺察罷免以薦起左副都御史扈蹕承天還京卒

許相卿字伯台海寧人正德十二年進士世宗立授兵科給事中宦官張銳張忠有罪論死帝復寬之給事中顧濟疏爭帝下所司議卒欲寬其死相卿言天下望陛下為孝皇陛下奈何自處以正德帝議加興獻帝皇號相卿復爭之嘉靖二年詔廢中官張欽義子李賢為錦

衣世襲指揮相卿言于謙子冕止錦衣千戶王守仁子
正憲止錦衣百戶賢中官廝養反過之忠勛大臣裔曾
不若近倖奴殉國勤事之臣誰不解體部臣彭澤科臣
許復禮安磐相繼言之悉拒不納母乃重內侍而輕士
大夫哉尋復言天下政權出于一則治二三則亂公卿
大夫參議則治匪人僭干則亂陛下繼統之初登用老
成嘉納忠諫裁抑僥倖竄殛憐邪可謂明且剛矣曾未
再期偏聽私昵批政亟行明少蔽剛少遜操權未得其

術而陰伺旁竊者得居中制之如崔文以左道罔上師
保臺諫言之而不聽羅洪載守職逮繫廷臣疏七十上
而不行近又庇崔文奴奪法司之守斤林俊以違旨怒
言官之奏擾事涉中人曲降溫旨犯法不罪請乞必從
此與正德朝何異哉俊國之望也其去志決矣俊去類
俊者必不留陛下將與二三近習私人共理天下乎今
日天下與先朝異武宗時勢已阡危然元氣猶壯調劑
適宜可以立起何也承孝宗之澤也今日病雖稍蘇而

元氣已竭調劑無方將至不起何也承武宗之亂也伏
願深察亂機收還政柄取文輩置之重典然後務學親
賢去讒遠色延訪忠言深恤民隱務使官府一體上下
一心而後天下可為也同官趙漢等亦皆以文為言帝
卒不聽未幾以給事中李學曾章僞主事林應驄皆言
事奪俸復上疏諫指帝氣驕志怠甘蹈過譽詞甚切為
給事三年所言皆不聽遂謝病歸八年詔養病三年以
上不赴都者悉落職閒住相卿遂廢夏言故與同僚相

善既東政招之謝弗應

顧濟字舟卿崑山人正德十二年進士授行人擢刑科
給事中武帝自南都還卧病豹房惟江彩等侍濟言陛
下孤寄于外兩宮隔絕骨肉日疎所恃以為安者果何
人哉漢高帝卧病數日樊噲排闥警以高趙之事今羣
臣中豈無噲憂者願陛下慎擇廷臣更番入直起居動
息咸使與聞一切淫巧戲劇傷生敗德之事悉行屏絕
則保養有道聖躬自安不報再踰月而帝崩世宗即位

之月濟上疏曰陛下踐阼除弊納諫臣民踴躍思見德
化之成然立法非難守法為難聽諫非難樂諫為難今
新政所釐多不便於奸豪權倖臣恐盤據既深玩縱未
已非依怙宮闈必請托左右持法不固則此輩將叢聚
而壞之此守法之難也唐太宗貞觀初每尊羣臣使言
及至晚年諫者乃多忤旨陛下首闢言路臣工靡不因
事納忠高遠者似涉于迂闊切直者或過于犯顏若怒
其犯顏其言必不入視為迂闊則計必不行此樂諫之

難也尋復言內臣張雄張銳等誣誤先帝業已逮治又獲寬假願斷以大義俾無所售奸帝頗嘉納既又劾司禮蕭敬黨庇銳等而三法司會訊依違無大臣節不聽帝欲加興獻帝皇號濟言不可尋請侍養歸越數年卒子章志嘉靖三十二年進士累官南京兵部侍郎奏減進奉馬快船額南都人祀之

章僑字處仁蘭谿人正德十二年進士授行人嘉靖元年擢禮科給事中疏劾中官蕭敬芮景賢等又言三代

以下正學莫如朱熹近有聰明才智倡異學以號召天下好高務名者靡然宗之取陸九淵之簡便詆朱熹為支離乞行天下痛為禁革御史梁世驃亦言之帝為下詔中禁尋又請依祖宗故事早朝班退許百官以次啟事經筵日講賜清問密勿大臣勤召對又簡儒臣十數人更番直便殿以備咨訪上納其言而不能用奸人何淵請立世室於太廟東北僑力言其不可未幾又言添設織造內臣貪橫殊甚行戶至廢產鬻子以償惟急停

革與天下更始疏入不省又因條例營務劾定國公徐
光祚陽武侯薛倫不職倫遂解任尋請斥張璫霍齠等
不聽孝陵司香谷大用乞還京治疾僞言大用初連逆
瑾後引寧彬樹八黨之凶釀十六年之禍至先帝不得
正其終若不早遏絕恐乘間伺隙羣凶競起不至復亂
天下不止章下所司吳廷舉請召家居大臣議禮僞劾
其陰附邪說孟秋時享太廟帝遣京山侯崔元僞言奉
命臨時倉皇就位誠敬何存帝怒奪其俸二月歷禮科

左給事中出知衡州府終福建布政使

余珊字德輝桐城人正德三年進士授行人擢御史庶吉士許成名等罷教習留翰林者十七人珊以為濫疏論之語侵內閣不納乾清宮災疏陳弊政極指義子西僧之謬巡鹽長蘆發中官奸利事為所誣械繫詔獄謫安陸判官移知澧州世宗立擢江西僉事討平梅花峒賊遷四川副使備兵威茂嘉靖四年二月應詔陳十漸其畧曰陛下有堯舜湯武之資而無稷契伊周之佐致

時事漸不克終者有十正德間逆瑾專權假子亂政不知紀綱為何物幸陛下起而振之未幾而事樂因循政多苟簡名實乖謬宮府異同紛拏泄沓以為在朝廷而不在朝廷以為在宮省而不在宮省遂至天子以其心為心百官萬民亦各以其心為心此紀綱之類其漸一也正德間士大夫寡廉鮮恥趨附權門幸陛下起而作之乃今則前日之去者復來來者不去自夫浮沉一世之人擢掌銓衡首取軟美脂韋重富貴薄名檢者列之

有位致諛佞成風廉恥道薄甚者侯伯專糾彈罷吏議
禮樂市門復開賈販仍舊此風俗之壞其漸二也正德
間國柄下移王靈不振是以有安化南昌之變賴陛下
起而整肅之乃塞上戍卒近益驕恣曩殺許巡撫而姑
息頃遂殺張巡撫而效尤曩縛賈參將以立威近又縛
桂總兵而報怨致榆關妖賊效之而戕主事北邊庫吏
仿之而賊縣官陛下惑鄙儒姑息之談牽俗吏權宜之
計遂使廟堂號令出于二三戍卒之口此國勢之衰其

漸三也自逆瑾以來以苞苴易將帥故邊防盡壞賴陞
下起而中嚴之然積弊已久未能驟復今朶顏蹢躅於
遼海羗戎跳梁于西川北狄蹂躪于沙漠寇勢方張而
食肉之徒不能早見預料亟求制馭之方乃假鎮靜之
虛名掩無能之實跡甚且詐飾捷功濫邀賞賚虛張勞
伐峻取官階而塞上多事日甚此外裔之強其漸四也
自逆瑾以來盡天下之脂膏輸入權貴之室是以有劉
趙藍鄆之亂賴陞下起而保護之乃近年以來黃紙蠲

放白紙催徵額外之歛下及雞豚織造之需自為商賈
江淮母子相食兗豫盜賊橫行川陝湖貴疲于供餉田
野嗷嗷無樂生之心此邦本之搖其漸五也正德朝衣
冠蒙禍家國幾空幸陛下起而收錄之乃未幾而狂瞽
之言一鳴輒斥昔猶謫遷外任今或編配遐荒昔猶禁
錮終身今至箠死殿陛蓋自呂柟鄒守益等去而殿閣
空顧清汪俊等去而部寺空張原胡瓊等死而言路空
間有一二忠直士又為權奸排擠而違之俾不通致陛

下耳聳目眩忽不自知其在鮑魚之肆矣此人才之彫
其漸六也正德朝奸邪迭進忠諫不聞幸陛下起而開
通之顧閱時未久而此風復見降心未懲其憤逆耳或
動諸顏不勦說而折人以言即臆度而虞人以詐朝進
一封暮投千里甚至三木囊頭九泉含泣此言路之塞
其漸七也正德朝忠賢排斥天下幾危賴陛下起而主
持之豈期一轉瞬間儉邪投隙而起飾六藝以文奸言
假周官而奪漢政堅白異同模稜兩可是蓋大奸似忠

大詐似信王莽匿情于下士之日安石垢面于入相之初雖有聖賢誰其辨之臣恐正不敵邪羣陰日盛此邪正之淆其漸八也正德之世大臣日疎小人日親致政事乖亂賴陛下紹統堂廡復親乃自大禮議起凡偶失聖意者譴謫之鞭笞之流竄之必一網盡焉而後已由是小人窺伺巧發奇中以投主好以弋功名陛下既用先入為主順之無不合逆之無不怒由是大臣顧望小臣畏懼上下乖戾寔成睽孤而泰交之風息矣此君臣

之睽其漸九也正德之世天鳴地震物怪人妖曾無虛
歲賴陛下紹統災異始除乃頃歲以來雨雹殺禽獸雷
風拔樹屋婦人產子兩頭無極晝晦如夜四方旱潦奏
報不絕曾何異正德之季乎且京師陰霾之氣上薄太
陽白晝冥冥罕有暉采尤為可畏此災異之臻其漸十
也此十者天子有一無以保四海陛下聖明何以致此
無乃輔弼呂之歟竊見今日之為輔弼第一人者徒以
奸佞伴食怙恩致上激天變下召民災中失物望臣逆

知其非天下之第一流而陛下乃任信之不至于魚爛
不已願亟去其人更求才兼文武如前大學士楊一清
老成厚重如今大學士石琚者竝置左右庶弊政可除
天下可治臣又聞獻皇帝好賢下士容物恕人天下所
共知也今議禮諸臣一言未合輒以悖逆加之謫配死
徙朝寧為空此豈獻皇帝意苟非其意雖尊以天下無
當也陛下何不起而用之使駿奔清廟以慰獻皇帝在
天之靈哉疏反覆萬四十言最為剴切帝付之所司其

所斥輔弼第一人謂費宏也珊律已清嚴居官有威惠
外艱歸士民祠之名宦後副使胡東臯謁祠獨顧珊嘆
曰此吾師也服闋以故官涖廣東終四川按察使先是
有御史汪珊者于嘉靖元年七月疏陳十漸畧言陛下
初即位天下忻然望治邇來漸不如初初每事獨斷今
戚里左右或潛移陰奪初每事咨訪大臣今禮貌雖隆
而實意日疎初罷諸不經淫祠今稍稍議復初屏絕玩
好今教坊諸司或以新聲巧伎進初日覽奏章今或置

不省輒令左右可否初釐革冗食冗費今騰驤勇士不行覈實御馬實數不得稽察初裁革錦衣冒濫今大臣近侍以迎立授世廕舊邸旗校盡補親軍初中官有罪懲以成法今犯者多貸死舉朝爭不得初中官有過不復任用今鎮守守備營求易置倖門復啟初納諫如流今政事不便者言官論奏直曰有旨訑訑拒人帝頗納其說未幾出為河南副使歷官至南京戶部右侍郎珊字德聲貴池人正德六年進士巡撫貴州時討都勻叛

苗有功

韋商臣字希尹長興人嘉靖二年進士授大理評事明年冬商臣以大禮初定廷臣下吏貶謫者無虛日乃上疏曰臣所居官以平獄為職乃自授任以來竊見羣臣以議禮忤旨者左遷則吏部侍郎何孟春一人謫戍則學士豐熙等八人杖斃則編修王思等十七人以拂中使逮問則副使劉秉鑑布政馬卿知府羅玉查仲道等十人以失儀就繫則御史葉奇主事蔡乾等五人以京

朝官為所屬訐奏下獄則少卿樂護御史任洛等四人此皆不平之甚上千天象下駭衆心臣竊以為皆所當宥況比者水旱疫癘星隕地震山崩泉湧風雹蝗蝻之害殆徧天下有識莫不寒心及今平反庶獄復戍者之官錄死者之後釋逮繫者之囚正告訐者之罪亦弭災穰患之一道也帝責以沽名賣直謫清江丞量移德安推官遷河南僉事討平永寧巨寇以功受賞伊王虐殺其妃商臣論如律嘗治里居給事中杜桐殺人罪桐構

之吏部尚書汪鉉甫遷四川參議遂以考察落職歸言
官薛宗鎧戚賢戴銑輩交章救不納家居數十年卒

黎貫字一卿從化人正德十二年進士改庶吉士授御
史刷卷福建劾鎮守內官尚春侵官帑狀悉追還之世
宗入繼貫請復起居注之制命詞臣編類章奏備纂述
從之登極詔書禁四方貢獻後鎮守中官貢如故貫上
言陛下明詔甫頒而諸內臣曲說營私希恩固寵其假
朝命以徵取者謂之額而自挾以獻者謂之額外固虐

百姓致朝廷之澤壅而不流非所以昭大信彰君德也
嘉靖二年帝從玉田伯蔣輪請于承天立興獻帝家廟
以輪子榮奉祀貫言陛下信一諛臣之說委祀事于外
戚神不歆非類獻帝必將吐之不聽尋疏言國初夏秋
二稅麥四百七十一萬而今損九萬米二千四百七十
三萬而今損二百五十萬以歲入則日減以歲出則日
增乞敕所司通稽祖宗以來賦額及今日經費之數列
籍上聞知賦入有限則費用不容不節帝嘉納焉出接

江西父喪歸久之起故官會帝從張亨敬議去孔子王
號改稱先師並損籩豆佾舞之數編修徐階以諫謫御
製改正祀典說頒示廷臣而亨敬復為祀典或問以希
合帝意議已定貫率同官合疏爭之帝震怒曰貫等謂
朕已尊皇考為皇帝孔子豈反不可稱王奸逆甚矣其
悉下法司按治于是都御史汪鉉言比者言官論事每
挾衆以凌人曰此天下公議也不知倡之者止一人請
究倡議之人明正其罪帝然之已而刑部尚書許讚等

上其獄當贖杖還職帝特命褫貫為民久之卒於家方
貫等上疏時禮科都給事中華陽王汝梅亦率同官抗
論且曰陛下萬幾之餘留神典禮甚盛舉也但恐生事
之臣望風紛起今日獻一議謂某制當革明日進一說
謂某制當復國家自此多事矣況祖宗成法守之百六
十年縱使少不如古循而行之亦未為過何必紛紛事
更易乎帝覽奏斥其違旨以祀典說示之汝梅字濟元
由行人歷禮科都給事中八年二月以災異求言汝梅

言比來章奏多逢迎請分別忠佞毋信諛言大臣奏事
近多留中請悉付之公論人主之學詞命非所重今一
事之行動煩宸翰亦少褻矣宜倣祖宗故事時御平臺
召見宰執面決大議既省筆札之勞且絕壅蔽之害疏
入忤旨及夏言請分祀天地汝梅復偕同官力爭尋出
為浙江參政卒官

彭汝實字子充嘉定州人正德十六年進士授南京吏
科給事中嘉靖三年疏言九江盜起殺傷官軍操江伍

從之呂枬鄒守益下獄汝實抗章救又因災異上言邇者黃風黑霧春旱冬雷地震泉竭揚沙雨土加以羣小盛長盜賊公行萬民失業木異草妖時時見告天變于上地變于下人物變于中而修省之詔無過具文廷陞之間忠邪未辨以逢迎為合禮以守正為沽直長鯨巨鯢決網自如腴田甲第橫賜無已陛下春秋已逾志學而經筵進講畧無問難黃閣票擬依常批答棄燕閒于

女寵委心腹于貂璫二廖諸張尚然緩死李隆蘇晉竟
得無他如此而望天意回人心感不可得矣大學士費
宏以子坐事被論不出禮部侍郎溫仁和以慶王台溶
事聽勘汝實言宜聽二臣避位以明進退之義因薦石
珪羅欽順顧清蔣冕可代宏李廷相崔銑湛若水何塘
許告可代仁和章下所司奸人王邦奇之訐楊廷和彭
澤也汝實言邦奇先後兩疏始為惶駭之語終雜鄙褻
之辭中所引事多顛倒淆惑至謂費宏石珪夜入楊一

清門今不聞召問一清一清又久不為白何也陛下即位之初廷和裁省冗員數萬坐此叢怒罷去今其長子業以狂愚發遣亦可已矣而羣小蓄忿蔓連不已并其次子及婿又復下獄夫誣告之律視其所誣輕重反坐此國法也願追究主使之人與告人同罪毋令苟免貽譏外蕃不聽汝實數言時政缺失又嘗力爭大禮為璵萼等所惡以親老再疏請改近地教職而舉貢士高任說王表自代章下吏部承璵萼指言汝實倡言鼓衆撓

亂大禮且與御史方鳳程啟充朋黨通賄自知考察不容乃欲辭尊居卑不當聽其倖免遂奪職閒住與啟充及徐文華安磐皆同里時稱嘉定四諫

鄭自璧字采東祥符人隸籍京師正德十二年進士改庶吉士除工科給事中世宗踐阼中外競言時政自璧請采有關化理者類輯成書以備觀覽從之初正德中奄人多奪民業為莊田至是因民訴遣使往勘自璧復備言其弊帝命勘者嚴治民患稍除嘉靖二年後父陳

萬言辭黃華坊賜第請西安門外新宅詔予之自壁以
所請宅已鬻之民不當奪與安磐力爭不聽明年爭大
禮受杖三遷至兵科都給事中中官李能以修墩堡為
詞請定山海關稅額中官張忠尚書金獻民等論甘肅
功廕子錦衣其下參隨皆進秩鎮守江西中官黎鑑參
隨踰常額中官武忠從子英冒功擢副千戶錦衣官裁
革者多蚩緣復職而司禮監奏收已汰諸匠近五百人
孝陵淨軍于喜擅赴京奏辨安邊伯許泰戍死其子請

襲祖職中官扶安黃英先後死官其親屬自璧皆抗疏
爭帝多不聽嘗偕同官劾郭勛奸貪及李福達事起復
劾勛交結妖人帝以勛故降旨責自璧六年三月宣府
失事復劾總兵傅鐸并及鎮守中官王玳巡撫周金副
將時陳等罪鐸逮問陳褫冠帶而玳金責立功贖罪禮
部侍郎桂萼請起王瓊于邊自璧率同官與御史譚纘
等言瓊罪宜追治萼引奸邪請并論不納自璧最敢言
所言皆權倖直聲震朝野側目者共為蜚語聞于上吏

部以資推太僕寺卿不用至是科道共劾中旨降二級
調外任遂謫江陰縣丞命下大臣幸其去無救者後廷
臣屢論薦竟不召

戚賢字秀夫全椒人嘉靖五年進士授歸安知縣縣有
蕭總管廟報賽無虛日會久旱賢禱不驗沉木偶于河
居數日舟過其地木偶躍入舟舟中人皆驚賢徐笑曰
是特未焚耳趨焚之潛令健隸入岸傍社誠之曰水中
人出械以來已果獲數人蓋奸民募善泅者為之也知

府萬雲鵬操下急賢數忤之當上計有毀雲鵬者將被
黜賢走吏部白其枉雲鵬竟得免而尚書桂萼獨心異
賢喪去起知唐縣召為吏科給事中十四年春當大計
外吏大計罷者列永不用而是時言事諸臣忤柄臣意
率假計典錮之賢乃先事言所黜有未當者宜聽言官
論救帝稱善從其請會參議王存韋商臣言事忤要人
前給事中葉洪劾汪鉉被謫果在黜中賢方勘事陝西
給事中薛宗鎧因據賢疏伸救吏部特不可帝遂命已

之及賢還朝以鉉咨橫實張孚敬庇之乃條其罪狀曰
輔臣孚敬布腹心以操吏部之權懸利害以箝言官之
口即如考察一事陛下曲聽臣言許其中雪正防大臣
行私也今言官為洪等辯救孚敬乃曲庇冢臣巧言阻
遏陛下有堯舜知人之明輔臣負伯鯨方命之罪放流
之典具在惟陛下以威斷之帝內嘉賢言而重違孚敬
鉉意洪等竟不復再以喪去補刑科都給事中夏言柄
國會當選庶吉士不能無所徇賢疏陳請屬之弊帝納

其言久之劾郭勛吞噬徧天下太廟災復劾勛及尚書
張瓚樊繼祖等而薦聞淵熊浹劉天和王畿程文德徐
樾萬鏜呂柟魏校程啟充馬明衡魏良弼葉洪王臣可
任用言滋不悅激帝怒謫山東布政司都事諸被薦者
皆奪俸賢尋以父老自免歸十餘年卒賢少聞王守仁
說心契之及官于浙遂執弟子禮

劉繪字子素一字少質光州人祖進太僕少卿繪長身
修髯磊落負奇氣好擊劒力挽六石弓舉鄉試第一登

嘉靖十四年進士授行人改戶科給事中二十年詔兩京言官會遷邊才給事中邢如默等薦毛伯溫劉天和等二十人而故御史段汝礪副都御史翟瓚參議王洙與馬繪言汝礪乃大學士翟鑾姻戚瓚洙則夏言諭指如默排羣議而薦之者相臣挾權以遏言官言官懼勢而拂公議上下雷同非社稷福乞罷鑾言罪如默為徇私植儻者戒帝是其言出如默于外言適罷政鑾置不問明年寇大入山西繪上疏曰諂達方彊必為腹心患

議者謂宜守不宜戰以故邊將多自全或拾殘騎報首
功督巡諸臣亦第列士馬守要害名曰清野實則避鋒
名曰守險實則自衛請專任翟鵬得便宜從事馳發宣
大山西士馬合十七八萬人三路竝舉有進無退寇雖
多可計日平也帝壯其言令假鵬便宜得戮都指揮以
下然鵬舉不能出塞頃之劾山西巡撫劉臬結納夏言
且請罷吏部尚書許瓚宣府巡撫楚書臬書由是去職
繪兩劾言言憾之出為重慶知府土官爭地相讐言檄諭

之即定上官交薦而言再入政府屬言者論罷之家居
二十年卒子黃裳兵部員外郎倭陷朝鮮命贊畫侍郎
宋應昌軍務渡鴨綠江抵平壤大敗賊兵賊遁黃裳追
逐又連破之錄進郎中

錢薇字懋垣海鹽人嘉靖十一年進士受業湛若水官
行人洎然自守與同年生蔣信輩朝夕問學擢禮科給
事中請令將帥家丁得自耕塞下田毋徵其賦總督大
臣假便宜專制閫外格不行又疏劾大學士李時禮部

尚書夏言工部尚書溫仁和外戚蔣輪進右給事中郭
勛請復鎮守內官擅易置宿衛將校薇憤疏其不法七
事帝眷勛然素知其橫兩不問已因星變極言主德之
失帝深銜之未發疏諫南巡坐奪俸內閣夏言輩所選
宮僚多以徇私劾罷薇偕同官呂應祥任萬里乞如會
推故事集內閣九卿公舉帝特命竝斥為民累薦皆報
寢集鄉里晚進與講學足跡不及公府倭患起請於巡
撫王忬集兵為備鄉人德之卒年五十三隆慶初贈太

常少卿

洪垣字峻之婺源人嘉靖十一年進士禮部侍郎湛若水講學京師垣受業其門授永康知縣徵授御史十八年世宗南巡冊立皇太子命閣臣夏言顧鼎臣選宮僚垣再疏言溫仁和張衍慶薛僑胡守中屠應竣華察胡經史際白悅皇甫洵等皆庸流不可使輔導青宮帝亦已從他諫官言廢黜者數人未幾劾文選郎中黃禎先賄選郎楊育秀得為考官及居文選貪婪欺罔知州王

顯祖等考察調簡而補大州知縣何瑚年過六十而選御史皆非制今當大計京官乃以猥瑣之曹世盛為考功郎誤國甚帝下其章都察院令會吏科參覈乃下禎詔獄及育秀顯祖等咸斥為民因詰責吏部尚書許讚都御史王廷相而令十三道御史公舉隱年冒進若瑚者御史王之臣等坐調者四人世盛亦改他部垣一疏而御史曹郎以下得罪者至二十餘人出按廣東以安南款附增俸一級未竣出為溫州知府歲饑有閉糴者

饑民殺之垣坐落職歸復與同里方瓘往從若水若水
為建二妙樓居之家食四十餘年年九十瓘絕意仕進
嘗自廣東還同行友瘴死舟中例不載屍瓘秘不以告
與同寢累日至韶州始發之垣同年呂懷廣信永豐人
亦若水高弟子由庶吉士授兵科給事中改春坊左司
直郎歷右中允掌南京翰林院事每言王氏之良知與
湛氏體認天理同旨其要在變化氣質作心統圖說以
明之終南京太僕少卿

周思兼字叔夜華亭人少有文名嘉靖二十六年進士
除平度知州躬巡郊野坐籃輿中攜飯一盂令鄉民以
次舁行因盡得閭閻疾苦狀悉蠲除之王府奄人縱莊
奴奪民產監司杖奴斃奄迫王奏聞巡撫彭黯令思兼
讞之王置酒欲有所囑竟席不敢言思兼閱獄詞曰此
決杖不如法罪當杖以王故加一等奄誣告罪當戍以
王故末減監司竟得復故秩旁郡饑民掠食所司持之
急且為亂上官檄思兼治之作小木牌數千散四郊令

執牌就撫悉振以錢穀事遂定入覲舉治行第一當遷
州人走闕下以請乃復留一年擢工部員外郎督臨清
磚廠士民遮道泣送同年生貌類思兼使經平度民競
走謁見非是各歎息去河將決思兼募民築隄身立赤
日中隄成三日而秋漲大發民免于災進郎中出為湖
廣僉事岷府宗室五人封爵皆將軍殺人掠貨財監司
避不入武岡者二十年思兼廉得奸狀縛其黨悉繫之
獄五人藏利刃入思兼與揖而捫其臂曰吾為將軍百

口計將軍乃為此曹死耶皆沮退乃列其罪奏聞悉錮之高牆還田宅子女於民遭內艱去官不復出居久之起廣西提學副使未聞命而卒

顏鯨字應雷慈谿人嘉靖三十五年進士授行人擢御史出視倉場奸人馬漢怙定國公勢貸子錢漕卒償不時則沒入其糧為怨家所訴漢持定國書至鯨立論殺之四十一年畿輔山東西河南北大稔鯨請州縣贓罰銀毋輸京師盡易粟備振且發內府新錢為糴本帝悉

報可已上漕政便宜六事明年出按河南伊王典模怙
惡久結掖廷中官嚴嵩父子內外應援所請奏立下爪
牙率礦盜鯨欲除之與參政耿隨卿計持王承奉王鑑
罪鑑日告王所謀時嵩已敗鯨乃奏記徐階說諸大璫
絕其援又盡捕王偵事飛騎託言防寇檄知府兵分屯
要害地乃會巡撫胡堯臣劾典模抗旨矯敕僭擬淫虐
十大罪王護衛及諸亡命幾萬人不敵發帝震怒廢王
為庶人錮之高墻沒其貲削世封兩河人鼓舞相慶景

王之國越界奪民產為莊田鯨執政其爪牙魏國公侵民產假欽賜名樹碑為界鯨仆其碑戍其人錦衣帥受諸俠少金署名校尉籍中為民害列侯使王府道路驛騷王府內官進奉駕龍舟所過恣橫鯨請校尉缺從兵部補冊封改文臣王府進奉遣屬吏詔冊親王及妃遣列侯餘皆如鯨議改督畿輔學政大興知縣高世儒奉詔核逃役都督朱希孝以勾軍劾之下部議鯨劾希孝亂法言世儒等按籍召行戶非勾禁軍此乃禁軍子弟

家人倚城社冒禁衛名致吏不敢問富人得抗詔而貧者為溝中瘠世儒無罪罪在錦衣帝怒責鯨詆誣勛臣貶安仁典史隆慶元年歷湖廣提學副使以試恩貢生失張居正指降山東參議改行太僕少卿都御史海瑞薦鯨異才不報鯨按河南時黜新鄭知縣其人高拱所庇也在湖廣王篆欲祀其父鄉賢執不許至是拱掌吏部篆為考功遂以不謹落鯨職萬厯中給事中鄒元標御史饒位交章薦之報寢御史顧雲程言陛下大起遺

佚獨鯨及管志道以考察格之夫相與冢宰賢則黜幽
為公典否則驅除異已而已近又登用被察吳中行艾
穆魏時亮趙世卿獨靳鯨志道何也給事中姜應麟李
弘道亦言之僅以湖廣副使致仕中外論薦十餘疏不
果用

贊曰傳稱未信而諫則以為謗已然志節之士惓惓忠
愛何忍以不信自外其君哉張芹等懷抱惓忱激昂論
事其言雖不盡用要與緘默者異矣

明史卷二百八

欽定四庫全書

明史卷二百八考證

張芹傳給事中竇明言事下獄

臣章宗瀛按竇明言

事下獄史未詳所言何事他書亦無可考謹識

汪應軫傳遂出為泗州知州

臣章宗瀛按應軫去泗

之日行李蕭然父老送者皆泣下建祠立碑紀其去

後思詳諸大綬所撰墓志謹識

汪應軫傳在科歲餘所上凡三十餘疏

臣章宗瀛按

三十餘疏史僅舉其一二疏餘未臚列他書亦無可據考諸大綬所撰墓誌亦僅言申王守仁之謗留林俊諫垣之任遵典禮崇正統諸疏而已謹識

蕭鳴鳳傳

高公韶附

嘗劾總兵官郭勛罪

臣章宗瀛

按郭勛被劾史未詳何事他書亦無可考謹識

齊之鸞傳又劾許泰及兵部尚書王憲

臣章宗瀛按

泰憲被劾史未詳何事後文可憂者三可惜者四亦未臚列他書皆無可考謹識闕疑

許相卿傳宦官張忠有罪論死

臣章宗瀛按傳

內所載張銳張忠有罪及羅洪載守職逮繫李學曾等言事奪俸俱未詳何事他書亦無可考謹識

章僑傳疏劾中官蕭敬芮景賢等

臣章宗瀛按蕭敬

芮景賢被劾及後文張璉霍韜等被斥史未詳何事他書亦無可考謹識闕疑

余珊傳致榆關妖賊效之而我主事北邊庫吏仿之而

賊縣官

臣

章宗瀛按主事縣官史未詳其姓氏他

書亦無可考謹識闕疑

黎貫傳刷卷福建劾鎮守內官尚春侵官帑狀

臣章

宗瀛按識大錄貫刷卷福建時兼有覈倉庫軍衛器械之識故追尚春銀十三萬有奇種二十六萬石謹識

黎貫傳帝意議已定貫率同官合疏爭之

臣章宗瀛

按識大錄貫率同官合疏時鎡使人止之曰疏上必得重禍且將命爾按粵西矣貫不聽疏上果震怒後

鉉迎合孚敬欲置諸死許讚力持之怒稍解乃罷為

民謹附識

彭汝實傳呂柟鄒守益下獄汝實抗章救

臣章宗瀛

按呂柟鄒守益下獄事詳二人本傳謹識

彭汝實傳二廖諸張尚然緩死李隆蘇晉竟得無他

臣章宗瀛按緩死及無他史俱未詳何事他書亦無

可考謹識闕疑

咸賢傳復劾勛及尚書張瓚樊繼祖等

臣章宗瀛按

張瓚樊繼祖等被劾史未詳何事他書皆無可考謹識闕疑

錢薇傳又疏劾大學士李時

臣章宗瀛按蔣信所撰

錢薇墓表云是時臺諫畏李時諸人莫有言者薇上疏論其傷大臣之體謹識

錢薇傳郭勛請復鎮守內官擅易置宿衛將校薇憤疏

其不法七事

臣章宗瀛按七事史未詳載他書亦

無可考謹識

洪垣傳御史王之臣等坐調者四人世盛亦改他部垣

一疏而御史曹郎以下得罪者至二十四人

臣章

宗瀛按四人及二十餘人史未詳其姓氏他書亦無
可考謹識

顏鯨傳已上漕政便宜六事

臣章宗瀛按六事史未

詳載考識大錄及獻徵錄云省糧耗惜夫力支折銀
恤班軍任監允查稽誤謹識

顏鯨傳劾典英抗旨矯敕僭擬淫虐十大罪

臣章宗

瀛按十大罪史未詳載他書亦無可考謹識闕疑



明史卷二百八考證